

HOSEA

Hosea adavana bona natuna

¹ Ina na Iehova ena hereva, Hosea Be-eri enai e kau herevana, Iuda pavapavadia Usia bona Iotam bona Ahasa bona Hesekia bona Israel pavapavana Ieroboam Ioasa edia nega ai.

² Iehova ese Hosea uduna amo e hereva matama negana ai, Iehova ese Hosea e hamaoroa, eto, Aola, ariara hahinena ta bavadavaia, bona ariara memerodia ba havaradia, badina be ina tano tau-dia e lebulebu hereamu, Iehova irakatanina ai.

³ Taunabunai ia na ela, Gomere, Diblaimi natuna hahinena, e abia; bena hahine na e rogorogo, natuna maruanena ta e abia.

⁴ Iehova ese e hamaoroa, eto, Ladana ba nemaia Iesrele; badina be asi vanahana lau ese Iehu iduhuna davana baina henia, Iesrele rarana dainai, bona Israel iduhuna basileiana baine haoreea.

⁵ Una dina ai Israel ena peva baina hakwaidua, Iesrele kourana ai.

⁶ Hahine na e rogorogo lou, natuna kekenina ta e abia. Iehova ese Hosea e hamaoroa, eto, Ladana ba nemaia “Se bogaia hisimu”; badina be ina murinai lau ese Israel iduhuna taudia basina bogadia hisi, bona edia dika basina gwau tao, lasi ona lasi vaitani.

⁷ A Iuda iduhuna taudia baina bogadia hisi; lau Iehova, edia Dirava, sibogu ese baina hamauridia, dia peva eiava dare eiava tuari eiava hosi eiava hosi-gui taudia amo.

⁸ “Se bogaia hisimu” ese sinana ratana e rakatania murinai, hahine na ma e rogorogo lou, bena mero ta ma e abia.

⁹ Bena Iehova eto, Ladana ba nemaia “Dia lauegu bese”; badina be umui na dia lauegu bese bona lau na dia emui Dirava.

¹⁰ Ģau tamona, Israel taudia na bae hutuma, kone mirina na heto, basie hahetohodia bona basie duahidia diba ġauna. E hamaorodia “Umui na dia lauegu bese” gabuna ai, bae hamaorodia, baeto “Mauri Diravana natuna verina”.

¹¹ Bena Iuda taudia bona Israel taudia na bae hahebou, ikwaradia tauna tamona bae gwauraia hidi. Bena tano amo bae dae lao, badina be Iesrele ena dina baine bada.

2

Iehova ena uraheni ena gwau-edede besena enai

¹ Tadikamamui ba hamaorodia, baoto “Egu bese”, bona taihumui ba hamaorodia, baoto “Hebogahisi vada e davaria”.

² Sinamui ba noia,

badina be ia na dia lau adavagu,

bona lau na dia ia adavanaugh;

ba noia, ena ariara karadia na vairana amo baine atodia siri,

bona ena heuda-hanai ratana padadia amo;

³ ena dabua iboudiai baina tapusi oho

ena vara dinana ai e ga ae heğereğerena ai baina halaoa,

tano ġaġaena bona tano kaukauna heğereğerena ai baina halaoa,

bona ranu-mase amo baina alaia na garina.

⁴ Ia natuna danu basina bogadia hisi,
badina be idia na ariara natudia.

⁵ Badina be sinadia ese ariara karadia vada e kara,
e havaradia hahinena ese hemarai karadia
vada e kara.

Badina be ia eto: E ura henigumu taudia muridia
amo bainala,
idia ese aniani bona ranu e henigumu,
egu mamoe huina bona egu varo aukana,
egu dehoro bona egu inuinu ġauna danu.

⁶ Taunabunai au ginigini amo baina maġua ahu,
ia ilao-ahuna maġuna baina haginia,
bena ena dala basine davaridia dibā.

⁷ E ura heniamu taudia na baine gavadia,
to basine lasidia tao;
baine tahudia,
to basine davaridia.

Bena baineto: Lau na bainala,
adavagu gunana baina lou henia,
badina be una negana ai egu noho na namo,
a harihari egu noho na dikā.

⁸ Ia na asi dibana,
uit bona vine ranuna bona dehoro na
lau ese na henia;
silver be lau ese na henia momomomo,
bona *gold* danu, Baal e henia ġauna.

⁹ Taunabunai, egu uit baina abia lou, ena nega ai,
bona egu vine ranuna danu, ena hua ai;
egu mamoe huina bona egu varo aukana,
ia ihadabulaina ġaudia,
baina abidia oho.

¹⁰ Harihari lau ese baina hahemaraia,
e ura heniamu taudia vairadai;
ta ese basine harohoa mauri,
lau imagu nuana amo.

- 11** Ena moale idoinai baina hadokoa,
 ena aria, ena hua matamatadia bona ena dina
 helaḡadia,
 bona e gwaurai guna ariadia iboudiai danu.
- 12** Ena vine bona ena suke audia,
 e herevalaidia, eto “Lau davagu bini
 e ura henigumu taudia ese e henigu” ġaudia na
 lau ese baina havahudia;
 uda ai baina halaodia,
 bena uda boromadia ese bae anidia.
- 13** Baal edia aria dinadia e badinadia dainai,
 lau ese baina hahisia;
 unu dinadia ai muramura mai bonana e gabu
 henidia,
 ena vaġivaġi bona ena herahera nadidia e
 heralai,
 e ura henia taudia muridia amo ela,
 a lau e lalogu boio.
 Iehova na e herevamu.
- 14** Taunabunai, a itaia, baina ha-uraia,
 tano ġaġaena ai baina hakaua lao,
 lalokau herevadia amo baina hereva henia.
- 15** Unuseni ai ena vine imeadia baina henia,
 bona Akoro Kourana na helaro iduarana ai
 baina halaoa.
 Unuseni ai danu ia na baine haere, ulatona ne-
 gana ai heġereġerena,
 Aigupto tanona amo e raka lasi negana ai
 heġereġerena.
- 16** Iehova na e tomu, Una dina ai ba gwauraigu
 “Lau adavagu”, basio gwauraigu lou “Egu Baal”.
- 17** Badina be Baal ladadia na uduna amo baina
 abidia oho, ladadia basine hato lou.
- 18** Una dina ai baina haherohemui maino, umui
 bona uda boromadia bona atai manudia bona

tano ai e raumu ġaudia; bona peva, dare, tuari na tano ai baina hadokodia; bena mai mainomui ida ba hekure diba.

¹⁹ Maohenigu ai baina halaomui ela bona hanai-hanai, oibe, maohenigu ai baina halaomui, kara maoromaoro ai bona hahemaoro ġoevaġoева ai, lalokau ai bona hebogahisi ai.

²⁰ Heabidadama ai maohenigu ai baina halao-mui; bena Iehova vada ba dibaia.

²¹ Iehova na e tomu: Una dina ai guba baina haere henia, bena guba ese tanobada baine haere henia;

²² tanobada ese uit bona vine ranuna bona de-horo baine haere henidia, bena idia ese Iesrele bae haere henia;

²³ tano ai ia baina hadoa lauegu. Bena “Se bogaia hisimu” na baina bogaia hisi; bona “Dia lauegu bese” baina hamaoroa, bainato “Oi na egu bese”, bona ia baineto “Oi na egu Dirava”.

3

Hosea bona heuda-hanai hahinena

¹ Iehova ese ma e hereva henigu, eto, Ma baola, tau ta ese e eno henia bena ia ida e heuda hanai hahinena na ba ura henia, Iehova ese Israel taudia, dirava idaudia e haġerediamu bona vine huahuadia kaukraudia manedia e ura henimu taudia, na e ura henidiamu heġereġerena.

² Taunabunai, lau ese *silver sekeledia gwauta-ima** bona bali homere ta mai kahana amo na hoia.

* **3:2** Sekele gwauta-ima = $\frac{1}{2}$ lb. sisivana. Homere na Heberu taudia edia hahetoho ġauna ta.

³ Bena na hamaoroa, nato, Dina hoho adavagu ai baola, ariara karadia basio kara, idau tauna ta enai basiola; lau ese danu unu baina karamu toma.

⁴ Badina be Israel taudia na dina hoho bae noho, asi edia pavapava eiava edia lohia, asi edia boubou ġauna eiava edia au-tubua, asi edia dabua helaġana eiava edia kaivakuku.

⁵ Gabeamo, Israel taudia na bae lou, Iehova, edia Dirava, bona David, edia pavapava, bae tahu-dia; mai garidia ida Iehova mai ena hebogahisi ida bae lou henidia, dina gabedia ai.

4

Iehova ena hahebade Israel latanai

¹ Israel taumui e, Iehova ena hereva ba kamonai; badina be Iehova na mai ena hahebade, tano inoholaina taudia latadiai.

Asi heabidadama bona asi hebogahisi ina tano ai, bona Dirava asi dibadia danu;

² heuduguirai, koikoi, ala-ala, henao, heuda-hanai na mimia; ġau ta asie laloamu; roroma murina murina.

³ Una dainai tano na e taitaimu, bona inoholaina taudia iboudiai na e manorimu,

uda boromadia bona atai manudia danu; bona davara gwarumedia na e heabi ohomu.

⁴ Ta basine hepapahuahu, ta basine hahebade, badina be, hahelaġa tauna e, egu hepapahuahu na oi ida.

⁵ Dina ai ba hetutuhi,

- hanuaboi ai peroveta tauna danu oi ida ba
 hetutuhi;
 bona lau ese sinamu baina alaia mase.
- ⁶ Asi edia lalo-parara dainai egu bese taudia vada
 e hebua tari,
 badina be oi ese lalo-parara vada o dadaraia
 dainai
 lau ese na dadaraimumu, egu hahelağā tauna
 daguna amo;
- bona emu Dirava ena taravatu vada o laloa boio
 dainai
 lau ese oi natumu baina lalodia boio.
- ⁷ Idia na e hutumava negana ai,
 idia ese lau e kara dika henigu bada danu;
 idia hairaidia na hemarai ai baina halaoa.
- ⁸ Egu bese taudia edia kara dika na edia aniani,
 edia kara havara na e ani mata ganiganimu.
- ⁹ Hahelağā tauna hanua taudia na heheğereğere;
 edia dala daidiae davadia baina henidia,
 edia kara daidiae ahudia baina henidia.
- ¹⁰ Idia na bae aniani, to bogadia basie kunu;
 ariara karadia bae kara, a besedia basie vara;
 badina be idia ese Iehova vada e rakatania,
 ariara karadia iabi-daedia totona.
- ¹¹ Vine ranuna, ena be matamata,
 to ia ese lalo-parara e abia ohomu.
- ¹² Egu bese taudia ese au amo e karaia ġauna na e
 nanadaiamu,
 bona edia itotohi ese oru edia hereva e henidiamu.
 Badina be ariara karadia iura-henidia ese vada e
 hakaudia kerere;
 edia Dirava vada e rakatania, ariara karadia
 helaoreadia.

13 Ororo doridia ai boubou karadia e karamu,
 ororo komutadia ai boubou ġaudia e hahe-
 laġadiamu,
 oak bona poplar bona *terebinth* audia henudiai,
 badina be unu au ikerukerudia na nanamo.

Taunabunai, natumui hahinedia ese ariara kara-
 dia e karamu,
 bona ravamui hahinedia na e heuda
 hanaimu.

14 Natumui hahinedia ese ariara karadia e
 karamu eiava
 ravamui hahinedia na e heuda hanaimu ne-
 gadia ai na
 matadia basina hakanidia;
 badina be tatau danu ariara hahinedia ida e raka
 sirimu,
 bona boubou ġaudia e hahelaġadiamu mai
 lebulebu karadia ida.

Bese ta taudia bema asi edia lalo-parara,
 idia na bae dika vaitani.

15 Israel e, ena be ariara karadia o karamu,
 to Iuda na basioma hakerereia.

Gilgal ai basio raka vareai,
 Bet-avene ai basio dae kau;
 basio gwau hamata, basioto
 “Iehova na e maurimu heġereġerena”.

16 Boromakau hahinenia e daġedaġemu na heto,
 Israel na e daġedaġemu.

Harihari Iehova baine ubudia diba
 mamoe naluna rei gabuna badana lalonai na
 heto a?

17 Efraim na kaivakuku ediai e taomu;
 ainé noho.

18 Idia na kekero oreana, ariara karadia e karamu;

hemarai e ura henia badamu,
hairaidia e ura henia maraġimu.

¹⁹ Koe-hirihiri ese hanina lalonai vada e koedia,
bena edia ihaboulaina patadia daidiae bae
hemarai.

5

Israel ena raka-muri davana

¹ Hahelaġa taumui e, ina hereva a kamonai!

Israel iduhuna e, a hakala!

Hanua pavapavana ena rumu taumui e, a ka-
monai!

Badina be hahemaoro herevana na umui
emui ai.

Badina be umui na idoa Mispa ai,

bona e otoa huona Taboro ororona ai.

² Idia ese Sitim gurina vada e ġeia dobu;
a lau ese iboudiae matadia baina hakani.

³ Efraim na lau dibagu,

bona Israel na egū amo se hehunimu.

Efraim e, ariara karadia vada o kara dainai,
Israel vada eme miro.

⁴ Edia kara ese e laodia ahumu dainai,
edia Dirava basie lou henia diba;

badina be lalodia ese ariara karadia e ura henimu,
bona asi dibadia Iehova.

⁵ Israel ena hekokoroku ese e hahemaoro hen-
amu;

Efraim na ena kerere ai baine hekwakwanai,
Iuda danu idia iua bae hekwakwanai.

⁶ Mai edia mamoe bona edia nani seridia ida
baela,

Iehova itahuna totona,
a basie davaria;

- ia na edia amo vada e raka oho.
- ⁷ Idia ese Iehova vada e koia;
 badina be idau hahinedia ediai natudia vada
 e havaradia.
- Hari hua matamatana ese baine habuadia,
 mai edia uma ida.
- ⁸ Gibeai kibi ba hiriria,
 Rama ai danu ba hiriria;
 Bet-avene ai ba hone;
 Beniamina e, ba heude-heude!
- ⁹ Mata-hakani dinana ai
 Efraim baine hahevahu;
 Israel iduhudia bogaragidiai
 hereva momokanina na gwauraia
 hedinaraimu.
- ¹⁰ Iuda Iohiadina na
 tano hetoana e abia ohomu taudia
 heğereğeredia ai vada e hahelao;
 egu badu na latadihai baina seia dobi,
 ranu na heto.
- ¹¹ Efraim na vada e dağedağe henia, hahemaoro ai
 vada e taoa tari,
 badina be lalona e ha-aukaia, ġau asi anidia
 baine ġavadia.
- ¹² Taunabunai lau na pitopito na heto Efraim enai,
 bona houkahouka na heto Iuda iduhuna enai.
- ¹³ Efraim sibona ese ena gorere e itaia
 bona Iuda sibona ese berona e itaia negana ai,
 Efraim na Asuria ela,
 hereva e siaia lao, hanua pavapavana badana
 enai;
 a ia ese basine hamaurimu diba,
 eiava beromu basine hanamoia diba.

¹⁴ Badina be lau na leona heğereğerena ai bainala
 Efraim enai,
 bona leona natuna heğereğerena ai Iuda
 iduhuna enai.
 Momokani, lau ese baina daredia, bena baina
 raka oho;
 baina heaulaidia oho, ta ese basine hamau-
 ridia.

Israel ena helalo-kerehai na dia momokani

¹⁵ Egu gabu baina lou henia,
 ela bona edia kerere bae gwaurai hedinarai,
 bona vairagu bae tahua;
 ela bona edia lalo-hisihisi ai bae tahugu, baeto,

6

- ¹ Aoma, Iehova aita lou henia;
 badina be vada e dareda, baine hamaurida
 helaoreana;
 vada e botada, bena ia ese beroda baine ku-
 midia.
- ² Dina rua muridiai ia ese baine hamaurida;
 dina ihatoina ai ia ese baine hatoreda isi,
 ia vairanai baita mauri helaoreana.
- ³ Iehova baita dibaia,
 baguda baita hololai, ia baita dibaia helaore-
 ana;
 ena raka vaira na momokani, daba na heto;
 ia na dekedai bainema sisimu na heheto,
 bona medu barokodia, tanobada e hapari-
 pariamu ġaudia, na heheto.
- ⁴ Efraim e, ede baina karamu toma?
 Iuda e, ede baina kara henimu toma?
 Emui uraheni na daba orina na heto,
 eiava hunu, e puki haraġamu ġauna, na heto.

- ⁵ Taunabunai, peroveta taudia imadia amo vada
na dapadia,
udugu herevadia amo vada na aladia mase;
egu hahemaoro na e lasimu, diari na heto.
- ⁶ Badina be hebogahisi na uramu, dia boubou
karadia,
Dirava idiba-ḡoевана, dia ḡole-oho bouboudia.
- ⁷ A Adam ai idia ese taravatu vada e tataia utu;
unuseni ai idia ese vada e koigu.
- ⁸ Gilead na kara dika taudia edia hanua;
vatagadia na mai raradia.
- ⁹ Dadidadi taudia ese tau ta e bani heniamu na
heto,
hahelaḡa taudia na e haheboumu;
Sekem dalana ai idia ese taunimanima e roroma-
diamu,
oibe, kara dika-hereadia e karamu.
- ¹⁰ Israel iduhuna ai ḡau dika-rohorohona ta vada
na itaia,
Efraim ena ariara karadia na unuseni ai;
Israel vada e hahemiro.
- ¹¹ Iuda e, oi danu, itaboromu negana
vada e gwauraia guna.

Israel ena kara havara bona ena daḡedäge

Egu bese taudia edia noho-namo bama havaraia
lou nato negana ai,

7

- ¹ Israel bama hamauria nato negana ai,
Efraim ena kara havara e hedinaraiva,
bona Samaria ena kara dika danu;
badina be idia na e kara koikoimu;

henao tauna ese rum a habana e dareamu
 bona dadidadi taudia na murimuri ai e dadi-
 dadimu.

² To asie haeroamu
 lau ese edia kara dikadia iboudiai na lalodia
 taomu.

Harihari edia kara ese e koudia hegegeemu;
 idia na lau vairagu ai.

³ Edia kara dika amo idia ese hanua pavapavana e
 hamoaleamu
 bona edia kara hedibañani amo hanua lohia-
 dia danu e hamoalediamu.

⁴ Idia iboudiai na heuda-hanai taudia;
 idia na amu siahuna na heto;
 flaoa igabuna tauna ese lahi irakuna e
 hadokoamu,
 flaoa e kuiamu negana ela bona e tubumu
 negana.

⁵ Eda pavapava ena dina ai,
 hanua lohiadia na e keker, vine ranuna
 siahuna dainai;
 ia ese gonañona taudia ida imana e toi roro.

⁶ Badina be amu na heto lalodia na edia lalo-hadai
 koikoidia amo e siahumu;
 hanuaboi idoinai edia badu na gida na heto,
 daba ai e hururumu, lahi hururu-hururuna
 na heto.

⁷ Iboudiai na e siahumu, amu na heto;
 idia ese edia lohia e ha-orediamu.

Edia pavapava iboudiai vada e moru;
 idia ta ese se hahane henigumu.

⁸ Efraim na bese idau-idau taudia ida e heturamu,
 Efraim na se hurea hegiro atagana na heto.

⁹ Idau taudia ese ena goada e ha-oreamu,

- to asi dibana;
 huina vada e buruka,
 to asi dibana.
- ¹⁰ Israel ena heāgi ese e habadelaiamu;
 āgau tamona idia ese Iehova, edia Dirava, asie
 lou heniamu,
 ina idoinai vada e vara, to asie tahuā.
- ¹¹ Efraim na pune na heto,
 kavakava, bona asi darana;
 Aigupto e boi heniamu,
 Asuria e lao heniamu.
- ¹² Laodia ai egu huo amo baina koudia,
 atai manudia na heheto baina hamorudia;
 matadia baina hakanidia, edia kara dika
 daidiae.
- ¹³ Idia madi! Badina be egu amo vada e raka oho,
 Madi ihabaidia! Badina be vada e dağedağe
 henigu.
 Bama hamauridia,
 to idia ese koikoi herevadia na latagu ai e
 gwauraimu.
- ¹⁴ Idia ese lalodia amo asie tai henigumu,
 a edia mahuta āgaudia latadiai e āganāganamu;
 uit bona vine-ranuna daidiae sibodia e heğasimu,
 e dağedağe henigumu.
- ¹⁵ Ena be lau ese na hadibadibadia bona imadia na
 ha-aukadia,
 to lau ihadikalaigu e lalo hatamu.
- ¹⁶ Idia ese Baal e hağereamu;
 idia na koikoi pevana na heto.
 Edia lohia na dare ai bae mase,
 edia ere-dağedağe dainai.

Una dainai bae kirikirilaidia,
Aigupto tanona ai.

8

Israel igwau-henina

- ¹ Kibi a hiriria,
badina be bogibada ta na Iehova ena dubu
daenai,
badina be egu gwauhamata asie badinaia,
egu taravatu e tataia utu.
- ² Idia ese e boi heigumu, e tomu,
Egu Dirava e, ai Israel taumai dibamai oi.
- ³ Israel ese namo e dadaraiamu;
inai taudia ese bae hahavaia.
- ⁴ Idia ese pavapava e hahelaḡadia, a dia lau daigu
ai;
lohia danu e haginidia, a lau be asi dibagu.
Edia *silver* bona edia *gold* amo kaivakuku e kara-
dia,
idia sibodia ihabua-taridia.
- ⁵ Samaria e, emu boromakau natuna vada na
dadaraiamu.
Egu badu na e ġaraġaramu idia latadii.
Edena nega ai bae ġoеваġoева,
Israel lalonai?
- ⁶ Ima dibaka tauna ese e karaia;
una na dia Dirava.
Samaria ena boromakau natuna
bae hamakohia rohoroho.
- ⁷ Badina be lai e havaraia,
bena anina do bae abia, koe-hirihiiri.
Uit na vada e tubu, to asi adadia;

- anidia na basie dobi.
 Anidia bema dobi,
 idau taudia ese bema anidia ore.
- ⁸ Israel na vada e hadonoa,
 ina harihari idia na ġau asi anina
 bese idau-idau bogaragidiae.
- ⁹ Badina be idia na Asuria vada e dae lao,
 uda donikina sibona e loa eva-evamu na heto;
 Efraim ese ariara hahinedia davadia vada e
 kara.
- ¹⁰ Ena be bese idau-idau bogaragidia amo iduru-
 dia taudia bae vatudia,
 to lau ese baina.butudia oho.
 Bena pavapava bona lohia ihahelaġadie na bae
 hadokoa,
 ina nega sina ai.
- ¹¹ Badina be Efraim ese ihaboulaina patadia vada
 e hahohodia,
 kara dika ikaradia totona;
 unu na kara dika ihaboulaina patadia ai vada ela,
 ia enai.
- ¹² Ena be egu taravatu gerebu gerebu bama tore ia
 ena,
 to bema haerodia idau ġau.
- ¹³ Boubou karadia e ura henidiamu,
 vamu e hahelagaiamu bona e aniamu,
 a Iehova ese se moalelaidiamu.
 Harihari ia ese edia kara havara baine laloa tao,
 bona edia kara dika davadia baine kara;
 idia na Aigupto bae lou lao.
- ¹⁴ Badina be Israel ese Ikarana Diravana vada e
 laloa boio,
 pavapava rumadia vada e haginidiae,

bona Iuda ese hanua mai maǵudia vada e
hahohodia;
a lau ese lahi baina siaia ena hanua latadai,
bena ena gabu aukadia baine aradia ore.

9

Israel ena gwau-edede davana

- ¹ Israel e, basio moale,
basio hisi dae, bese idau-idau taudia na
heheto;
badina be ariara karadia vada o kara,
emu Dirava vada o rakatania.
Ariara karana davana vada o ura henia,
uit ikwadilaina gabudia iboudiai reireidia
latadai.
- ² Uit ikwadilaina gabuna bona vine itaolaina gu-
rina ese basie ubudia,
bona vine-ranuna matamatana ai bae dabu.
- ³ Idia na Iehova ena tano ai basie noho;
a Efraim taudia ese Aigupto tanona bae lou
henia,
bona idia ese aniani mai taravatudia bae ani
Asuria ai.
- ⁴ Iehova uduna ahuna vine-ranuna basie bubua,
bona edia boubou karadia amo basie
hamoalea.
Adia aniani na mase itailaina taudia adia
heǵereǵerena ai bainela,
bae ania taudia iboudiai na bae miro;
badina be adia aniani na boga helaoreana mo,
Iehova ena dubu ai basie vareailaia.
- ⁵ E gwauraia guna ariana dinana ai ede ba kara
toma?
Iehova ena aria dinana ai ede ba kara toma?

- 6** Badina be, a itaia, idia na Asuria e laomu;
 Aigupto ese baine haheboudia,
 Memefisi ese baine guridia.
 Ava hegarana ese edia *silver gaudia herea-daedia*
 bae habubunidia,
 au ginigini na edia kalaga ai bae vara.
- 7** Mata-hakani dinadia vada e kau,
 dava-abi dinadia vada e gini dae;
 Israel ese baine dibaia.
 Peroveta tauna na kavakava,
 bona lauma ese e roheamu tauna na kava,
 emu kara havara bada-herea
 bona emu dağedağe bada-herea daidai.
- 8** Peroveta tauna na Efraim, egu Dirava ena bese,
 igimana tauna,
 ġau tamona, manu-tahu tauna ena idoa na
 ena dala iboudiai lalodiai,
 bona dağedağe na ena Dirava ena dubu ai.
- 9** Idia na sibodia vada e hahemiro herea,
 Gibeas* dinadia heğereğeredia ai.
 Edia kara havara baine lalodia tao,
 edia kara dika davadia baine henidia.
- 10** Vine huahuadia tano ġaġaena ai na heheto,
 Israel unu na davaria toma.
 Suke au huahuana roboana, ena huahua laġanina
 gini-gunana ai,
 senemui unu na itadia toma.
 A idia na Baal-peoro ela,
 sibodia e hahelaġa Baal enai;
 bena vada e dika rohoroho,

* **9:9** Gibeas dinadia. Hahemaoro Taudia, Karoa 19, lalonai Gibeas sivaraina e toreia.

- e ura henia ġauna heğereğerena.
- 11** Efraim hairaina na baine roho oho, manu na heto;
 ta basine vara, ta basine rogorogo,
 ta basine haherogorogo.
- 12** Ena be natudia haida bae havaradia,
 to lau ese mase ai baina abidia oho,
 ela bona ta basine noho.
 Lau ese baina rakatanidia negana ai,
 idia na bae baia.
- 13** Efraim natuna vada na itadia, idia na damu ai baela;
 Efraim ese natuna baine hakaudia lasi, alala enai.
- 14** Iehova e, ġau ta ba henidia.
 Dahaka ba henidia?
 Mara-dika bogana bona rata asi anidia,
 unu na ba henidia.
- 15** Edia dika iboudiai na Gilgal ai,
 unuseni ai na inai henidia matama.
 Edia kara na dika rohoroho dainai,
 lau ese egu rumo amo baina luludia lasi;
 ina murinai basina ura henidia lou;
 edia lohia iboudiai na mai dagedagedia.
- 16** Efraim taudia na vada e rahudia mase,
 ramudia vada e marai, huahuadia basie dobi.
 Ena be natudia bae havaradia,
 to lau ese edia lalokau memerodia baina aladia mase.
- 17** Egu Dirava ese baine negedia daure,
 badina be idia ese asie kamonai henia;
 idia na bese idau-idau bogaragidiae
 bae loa kava loa kava.

10

- ¹ Israel na rigi momo vinena,
 huahuana danu e dobimu.
Huahuana e momo e laova negana ai
 ena ihaboulaina patadia ma e hahohodia;
ena tano ena namo e bada e laova negana ai
 ena au-tubua danu ma e hanamodia.
- ² Lalodia na mai koikoidia;
 harihari edia kerere davadia bae hua.
Iehova ese edia ihaboulaina patadia baine ġigidia
 dobi,
 bona edia au-tubua baine hagaridia.
- ³ Badina be harihari idia baeto:
 Ai na asi emai pavapava;
badina be Iehova garina asia garimu,
 bona pavapava ta ese ede bema hanamomai
 toma?
- ⁴ Idia ese hereva asi anidia mo e gwuraimu,
 gwauhamata herevadia asi anidia amo e heg-
 wau hamata hehenimu;
taunabunai hahemaoro na e tubumu,
 hahemase avadia na uma dadairadia ai e
 tubumu na heto.
- ⁵ Samaria inoholaina taudia kudoudia e heta-
 hamu,
 Bet-avene ena boromakau natuna dainai.
Ena taunimanima ese bae taitailaia,
 ena hahelaġa taudia, kaivakuku vairadai ha-
 helaġa karadia e karamu taudia, na
latanai bae tai heloġo-heloġo,
 vada e rakatania hairaina bae tailaia.
- ⁶ Oibe, ġauna na Asuria bae huaia lao,
 heaiva ġauna ai bainela, pavapava badana
 ena.

Efraim na bae hahemaraia,
 bona Israel ese ena kaivakuku hemaraina
 baine hemarai.

⁷ Samaria pavapavana baine mase,
 au seana ranu kopina ai na heto.

⁸ Avene ena atai gabudia, Israel ena kara dika
 toadia,
 bae hebuia tari.

Edia ihaboulaina patadia latadiai
 au ginigini bona ava ġiniġini na bae tubu.

Idia ese ororo bae hamaorodia, baeto “Ba ġovamai
 ahu”,
 bona ororo komutadia bae noidia, baeto “Ba
 ġorumai tao”.

⁹ Israel e, Gibea dinadia amo vada o kara dika;
 unuseni ai vada e kara dika loulou.

Tuari ese Gibea ai basine lasidia tao a?

¹⁰ Gwau-edede taudia baina vasi henidia,
 matadia ihakanidia totona;
 bona bese idauidau bae hahebou,
 idia ihadikadia totona;
 edia kara havara rua davadia bae abi negana
 ai.

¹¹ Efraim na boromakau hahinena matamatana,
 e hamananadaia ġauna;
 uit imoimailaina e ura henia,
 bera aiona namona na bogaia hisi;

a maduna auna na Efraim paġana ai baina atoa
 kau,

Iuda ese tano baine ruaia,
 bona Iakob ese sibona ena tano baine gaua.

¹² Kara maoromaoro ba hadoa emui,
 hebogahisi huahuana ba utua,

emui vahu tanona ba ruaia.
 Badina be ina na Iehova itahuna negana,
 ia bainema, hahemauri medu na heto
 latamui ai baine hadihoa helaooreana.

- ¹³ Kara havara vada o ruaia,
 hahemaoro gageva-gageva vada o utua,
 hereva koikoi huahuadua vada o ani.
 Badina be emui kariota vada o abidadama henid-
 dia,
 bona emui tuari taudia hutuma herea danu;
¹⁴ taunabunai tuari honedia na emui tauniman-
 ima bogaragidiai bae dae,
 bona emui kohoro iboudiai na bae hebua tari,
 tuari dinana ai Salamana ese Bet-arabele e
 habuaia tari na heto;
 una dina ai hahine mai natudia ida e huaridia
 patapata.
- ¹⁵ Israel taumui e, unu bae karamui toma,
 emui kara dika bada-herea dainai.
 Daba rere ai Israel pavapavana na
 baine henege daure vaitani.

11

Iehova ese Israel e lalokau heniamu

- ¹ Israel merona negana ailau ese na lalokau henia,
 bona natugu na Aigupto amo na boiria lasi.
- ² Egu boiboi na ediai na habadaia,
 to idia ese edia raka-muri e habadaia;
 Baal itomadiho-henidia asie hadokoa,
 bona muramura mai bonadia e gabu, kaivakuku
 yairadiai.
- ³ Gau tamona, lau ese Efraim taudia na raka
 na hadibalaidia,
 imagu ai na rosidia,

- to asie diba lau ese vada na hamauridia.
- 4** Hebogahisi varodia bona lalokau iğuidia amo na hakaudia;
 lau na maduna aukidia amo e abia ohomu tauna heğereğerena ai nala;
 na igo diho henidia, na ubudia.
- 5** Idia ese Aigupto tanona bae lou henia,
 Asuria na edia pavapava ai bainela,
 badina be asie ura bae lou henigu.
- 6** Dare ese edia hanua baine ala-ala henidia,
 bona edia ikoukou auridia baine ha-oredia;
 idia danu baine ha-oredia edia kohoro ai.
- 7** Egu bese taudia ese lalodia e ha-aukamu,
 bae rakatanigu e tomu;
 una dainai maduna vada e hegwaurai edia,
 bona ta ese basine abia oho.
- 8** Efraim e, ede baina kahumu nege toma?
 Israel e, haida imadia ai ede baina atomu toma?
 Ad.na heğereğerena ai ede baina halaomu toma?
 Seboimi heğereğerena ai ede baina kara hemimu toma?
 Lalugu ese UilU e dadaraimu;
 egu hebogahisi na e bada e laomu.
- 9** Egu badu ġaraġara basina halasia,
 Efraim basina habuaia tari lou.
 Badina be lau na Dirava, dia taunimanima;
 lau na Heläġa Diravana umui bogaragimui ai,
 hahebua-tari totona basina vasi.
- 10** Idia ese Iehova na bae gavaia,
 ia na leona na heto baine gou;
 oibe, ia na baine gou,

bena natuna na lahaba kahana amo baema
mai kudou-hetahadia ida;
11 mai kudou-hetahadia ida Aigupto amo baema,
manu na heheto,
Asuria tanona amo baema, pune na heheto;
bena ma baina haloudia, edia noho gabudia ko-
rikori baela.
Iehova na e herevamu.

Efraim igwau-henina

12 Efraim ese koikoi amo vada e hahegegegu dae
bona Israel iduhuna ese danu hedibağani
amo;
a Iuda na Dirava ese doini e dibaiamu,
ia na Helağä Diravana enai e taomu.

12

1 Efraim ese lai e reğuamu,
bona laurabada e gavaia loamu, dina idoinai.
Idia ese koikoi bona dağedäge e habadadiamu,
Asuria ida e herohe mainomu,
bona dehoro na Aigupto e laohiamu.

2 Iehova na mai ena hahebade Iuda latanai,
bona Iakob matana baine hakania, ena dala
heğereğeredia,
bona davana baine henia, ena kara
heğereğeredia.

3 Sinana bogana ai ia ese kakana ae-geduna e
dogoa tao,
bona tau-badana ai ia na Dirava ida e hedav-
erai.

4 Aneru ida e hedaverai, bena e kwalimu;
e taitai, ena lalo-namo e noinoilaia.
Betele ai ia na Dirava ida e hedavari,

- unuseni ai Dirava na ia ida e hereva;
- ⁵ Iehova, tuari oreadia edia Dirava,
ia ladana na Iehova.
- ⁶ Taunabunai, Dirava ena hekaha ai a lou,
lalokau bona hahemaoro ġoevaġoева ba dogo-
dia tao,
bona emu Dirava ba naria tarika-tarika.
- ⁷ Hoihoi tauna, metau ihahetohona ġauna
koikoina na imana ai
tauna ese taunimanima ihahisihisidia e
uramu.
- ⁸ Efraim eto “Momokani, to lau vada na taga,
kohu momo vada na habou egu”.
- Ġau tamona ena taġa idoinai ese
ena kerere basine rohoa.
- ⁹ Aigupto tanona amo
lau na Iehova, emui Dirava;
kalaga ai baina hanohomui lou,
e gwaurai ariadia dinadia ai heġereġerena.
- ¹⁰ Peroveta taudia na hereva henidia;
mata-hanai na hahohodia,
bona peroveta taudia ududia amo
sivarai heġereġeredia na hen.
- ¹¹ Bema kara havara na Gilead ai mia,
idia na momokani bae baia;
bema Gilgal ai boromakau mamaruanedia e ha-
helagadiamu,
edia ihaboulaina patadia na nadi senudia ai
baela,
uma dadairadia ai e habou nadi senudia na
heheto.
- ¹² (Iakob na Aram tanona e heau lao,
unuseni ai Israel na hesiai karadia e karava,

adavana idavalaina,
 adavana iabina totona mamoe e regudiava.)
 13 Peroveta tauna imana amo
 Iehova ese Israel na Aigupto tanona amo e
 hakaua lasi;
 bona peroveta tauna imana amo
 ia ese e hamauria.
 14 Efraim vada e dağedağe dikadika,
 taunabunai ena Čaubada ese rara
 ihahrebubuna gwauna na
 ia latanai baine hamiaia,
 bona ena maumau na ia latanai ma baine
 halou henia.

13

Efraim baine dikā vaitani

1 Efraim e hereva negadia ai,
 taunimanima na e heude-heude;
 Israel ai idia ese ia e imodaia,
 a Baal dainai e kerere, bena e mase.
 2 Harihari idia ese edia kara dikadia e hahohodiamu,
 bona edia kaivakuku na e hahetaria aurina
 amo e karadiamu;
 kaivakuku na *silver* amo e karadiamu mai ima-
 idibakadia ida,
 iboudiai na ima-idibakadia taudia ese e kara-
 diamu.
 Idia na e tomu “Ini na ba boudia”.
 Taunimanima ese boromakau natudia
 laulaudia e harahudiamu.
 3 Taunabunai, idia na daba ninoana heğereğerena
 ai baela,
 eiava e puki harağamu hununa heğereğerena
 ai;

uit ikwadilaina gabuna amo e heoda ohomu
 momona na heto,
 eiava kwalahu gaba-mauru amo e lasimu na
 heto.

⁴ Aigupto tanona amo
 lau na Iehova, emui Dirava.
 Dirava ta asi dibamui, lau mo;
 asi ihamaurimui ta, lau mo.

⁵ Tano ġaġaena ai na dibamui,
 medu se dihova tanona ai;

⁶ a e ani lava dae negana ai bogadia e kunu,
 bena e hekokorokuva;
 taunabunai e lalogu boio.

⁷ Una dainai lau ese baina kara henidia leona na
 heto;
 taiga na heto dala isena ai baina bani tao.

⁸ Bea, natuna vada e henaodia ġauna, na heto,
 latadiai baina roho kau,
 kemedia baina daredia.

Unuseni ai baina ha-oredia leona na heto,
 uda boromana ese bema daredia na heto.

⁹ Israel e, baina habuamu tari;
 daika ese baine durumu?

¹⁰ Harihari emu pavapava na edesenai ai,
 bona ede baine hamaurimu toma?
 Emu lohia iboudiai na edesenai ai,
 bona ede bae gimamu toma?

Umui ese o herevalaidia, oto
 “Pavapava ta bona lohia haida ba henimai”,
 taudia na edesenai ai?

¹¹ Egu badu ai pavapava haida vada na henimui,
 bona egu badu ġaraġara ai ma vada na abidia
 oho.

12 Efrai ena kara havara na vada e kumia,
ena kara dika na vada e koua.

13 Sinana e hekamonaimu,
to ia na kavakava merona,
ena vara negana vada e kau
to sinana bogana amo se lasimu.

14 Mase gabuna amo baina rauadia a?
Mase amo baina hamauridia a?
Mase e, emu hahehisi be edesenai ai?

Mase gabuna e, emu hahebua-tari be edesenai
ai?
Hebogahisi na matagu amo vada eme hehuni.

15 Ena be tadikaka bogaragidiai bema bada oho
bada oho,
to laurabada, Iehova ena lai, bainema,
tano ġaġena amo baine toa;
ela bona ranuna basine helohilohi,
bona ena ranu gabuna baine kororo;
ena habou-habou rumana lalona amo
ġau hereadia iboudiai baine ha-oredia.

16 Samaria ese ena kerere davana baine huaia,
badina be ia ese ena Dirava vada e daġedagħe
henia;
idia na dare ai bae mase,
natudia maraġidia na bae huaridia patapata,
bona edia rogorogo hahinedia na bae dapa-
dia parara.

14

Israel inoina

1 A Israel e, Iehova, emu Dirava, ba lou henia,
badina be vada o hekwawanai, emu kara
havara daidiae.

2 Mai herevamui ida baola,

Iehova ba lou henia;
 ba hamaoroa, baoto:
 Kara havara iboudiai bavabi oho;
 gau namona bavabia dae;
 bena bibinamai anidia baia henimu.

³ Asuria ese basine hamaurimai,
 hosí ai basia gui;
 bona imamai amo a kara gaudia basia hereva henida lou,
 basiato “Emai Dirava”.
 Oiemu ai ihareha ese
 hebogahisi e davariamu.

⁴ Edia kara-hebeatai baina abi oho,
 egu ura-kwalimu ai baina lalokau henidia,
 badina be egu badu na edia amo vada e siri.

⁵ Lau na hunu hegeregérena ai bainala, Israel enai,
 ia na baine gara kau, sosana* herahe-rana na
 heto;
 ramuna na tano ai bae diho, Lebanon audia
 na heheto;

⁶ ia tuhutuhuna bae idia roro;
 ia hairaina na olive hairaina hegeregérena ai
 baine hahelao,
 bona bonana na Lebanon bonana
 hegeregérena ai bainela.

⁷ Idia na bae lou mai, lau ikerukerugu ai bae noho;
 bae tubu, uma gaudia na heheto.
 Idia na bae huahua, vine auna na heto;
 bonadia bae dae, Lebanon vine-ranuna na
 heto.

* ^{14:5} “Sosana” na Heberu taudia edia herahera ta ladana; English gado ai ladana na “lily”.

8 Efraim e, lauegu ġaukara kaivakuku ediai be dahaka?

Lau ese na haere henimumu bona na gimate-

mumu.
Lau na beroso[†] auna, rauna se hehuhumu ġauna,

na heto;

huahuamu na lauegu amo e varamu.

9 Daika mai aonegana, ia ese ini ġau baine lalo davari.

Daika mai lalo-pararana, ia ese baine dibadia.

Badina be Iehova ena dala na mamaoro-

mamaoro;

kara maoromaoro taudia na lalodai e rakamu,

a kara kerere taudia na lalodai e hekwak-

wanaimu.

[†] **14:8** “Beroso” na au ta ladana Heberu gado ai.

**Buk Baibel long tokples Motu
The Holy Bible in the Motu language of Papua New
Guinea**

Copyright © 1959-1973 Bible Society of Papua New Guinea

Language: Motu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-10-09

PDF generated using Haiola and XeLaTeX on 28 Dec 2024 from source files dated 31 Aug 2023

35028c04-b277-5da3-8163-bb2fd39b90ca